

Morning Dogri (NSD) National News Bulletin 09-06-2024

आकाशवाणी

1. मनोमीत प्रधानमंत्री नरेन्द्र मोदी ते केन्द्री मंत्रिपरिषद दे नमें मिंबरें गी अज्ज संजा ले राष्ट्रपति भवन च राष्ट्रपति द्रौपदी मुर्मू आस्सेआ औहदे ते राजदारी दी सगंध दोआई जाग ।
2. ओडिशा कल संगारे 10 जून गी लगने आले सगंध चुक्कने आले शानदार समारोह दियां तैआरियां तेजिया कन्नै जारी ।
3. केन्द्री शिक्षा मंत्रालय नै राष्ट्री पात्रता दाखला मतेयान स्नातक (नीट-यूजी) च 1500 शा बद्ध मेदवारें गी दित्ते गेदे ग्रेस मार्क्स दी समीक्षा लेई 4 मिंबरी पैनल दा गठन कीता ।
4. भारतीय मौसम विभाग नै अगले 4 दिनें दरान पूर्वी ते मध्य भारत दे किश हिस्सें च लूह चलने दा अंदाजा लाया ऐ ।
5. टी-20 क्रिकेट विश्व कप 2024 च अज्ज भारत ते पाकिस्तान बश्कार मैच खेड्डेआ जाग ।

<><><><><><>

PM-Oath

राष्ट्रपति द्रौपदी मुर्मू होर मनोमीत प्रधानमंत्री नरेन्द्र मोदी ते उंदे मंत्रिपरिषद गी अज्ज संजा सवा 7 बजे राष्ट्रपति भवन च औहदे ते राजदारी दी सगंध दोआंगन । राष्ट्रपति होरें नरेन्द्र मोदी होरें गी सरकार दे गठन लेई साददा दित्ता ऐ । शुक्रवारें मोदी होरें राष्ट्रपति हुंदे कन्नै मलाटी लाइयै सरकार दे गठन दा दावा पेश कीता हा । बीजेपी दे अध्यक्ष जे.पी.नड्डा हुंदी अगुवाई च राष्ट्रीय जनतांत्रिक गठबंधन एनडीए दे शिष्टमंडल नै राष्ट्रपति हुंदे कन्नै मलाटी कीती ते नरेन्द्र मोदी होरें गी बीजेपी संसदीय दल दा नेता चुने जाने सरबंधी पत्र सौंपेआ । एनडीए दे सैहयोगी दलें दे समर्थन पत्र बी राष्ट्रपति होरें गी सौंपे गे । साढे संवाददाता नै जानकारी दित्ती ऐ जे केई सारे गोआंढी मुल्खें दे नेताएं गी इस समारोह लेई साददा दित्ता गेआ ऐ । समारोह च भारत दे गोआंढी मुल्खें हिंद महासागर क्षेत्र दे नेता ते होर दुए मन्ने परमन्ने दे लोक शामिल होंगन । इंदे च श्रीलंका दे राष्ट्रपति रानिल विक्रमसिंघे, मालदीव दे राष्ट्रपति मोहम्मद मुइज्जु, सेशेल्स दे उपराष्ट्रपति अहमद अफीफ, बंगलादेश दी प्रधानमंत्री शेख हसीना, मॉरीशस दे प्रधानमंत्री प्रविंद कुमार जुगन्नाथ, नेपाल दे प्रधानमंत्री पुष्प कमल दहाल 'प्रचंड' ते भूटान दे प्रधानमंत्री शेरिंग तोबगे शामिल न । बंगलादेश दी प्रधानमंत्री ते सेशेल्स दे उपराष्ट्रपति इस सिलसिले च कल नमीं दिल्ली पुज्जे ।

<><><><><><>

Live Swearing

आकाशवाणी राष्ट्रपति भवन च लगने आले शपथ ग्रेहण समारोह दा सिद्धा प्रसारण करोग । एह प्रसारण संजा 6 बज्जियै 45 मिंटे थमां आकाशवाणी दे एफ.एम.गोल्ड, इंद्रप्रस्त ते आकाशवाणी लाईव न्यूज चैनल पर कीता जाग । एह कार्यक्रम आकाशवाणी दे यू-ट्यूब चैनल पर बी कन्नो कन्नी प्रसारत कीता जाग ।

<><><><><><>

PM-Raj Ghat

मनोमीत प्रधानमंत्री नरेन्द्र मोदी होर अज्ज सगंध चुक्कने शा पैहले नमीं दिल्ली दे राजघाट च महात्मा गांधी होरें गी भावे भरोची श्रद्धांजलि भेंट कीती। श्री मोदी होरें राष्ट्री युद्ध स्मारक पर फुल्ल चाढ़े। ओह् अज्ज संजा सवा 7 बजे राष्ट्रपति भवन च उपरोतली त्रैह् बारी प्रधानमंत्री औह्दे दी सगंध लैंगन।

<><><><><><>

EAM

विदेश मंत्रालय दे प्रवक्ता रणधीर जयसवाल होरें लोकसभा चुनां च प्रधानमंत्री नरेन्द्र मोदी हुंदी जित्त पर उनेंगी मुबारकबाद देने आले ओमान ते सउदी अरब सनें मध्य-पूर्वी मुल्खें दे नेताएं दा धन्नबाद कीता। विदेश मंत्रालय दे प्रवक्ता होरें आखेआ जे प्रधानमंत्री मोदी होरें सउदी अरब दे क्राउन प्रिंस हुंदे प्रति अपना आभार जताया ते आखेआ जे भारत भविक्ख च दपक्खी सरबंधें च अभूतपूर्व उंचाई हासल करने आस्तै तत्पर हे। रणधीर जयसवाल होरें आम चुनां जित्तने पर ओमान दे सुल्तान हैयम बिन तारिक हुंदे प्रधानमंत्री मोदी होरें गी दित्ती गई शुभकामना आस्तै विदेश मंत्री होरें धन्नबाद दित्ता। विदेश मंत्रालय दे प्रवक्ता होरें जोर देइयै आखेआ जे भारत सरबंधें गी होर डूहंगा करने आस्तै ओमान सरकार कन्नै कम्म करने लेई तत्पर ऐ।

<><><><><><>

Odisha

ओडिशा च बीजेपी दी पैहली सरकार दे सगंध चुक्कने आले समारोह् दी तैआरियां तेजिया कन्नै जारी न। शपथ ग्रहण समारोह् राजधानी भुवनेश्वर दे जनता मैदान च कल संगारे 10 जून गी आयोजित होआ करदा ऐ। एह्दे शा पैहले भाजपा विधानमंडल दी बैठक लग्गोग। उआं बीजेपी नै अजें तगर नमें मुख् मंत्री दे नां परन खीरी मोहर नेई लाई ऐ ते दिल्ली च पार्टी संसदीय बोर्ड इस पर खीरी फैसला लेई सकदा ऐ। दऊं केन्द्री अब्सर्वरें दी मजूदगी च औपचारिक तौरा पर लीडर चुनने लेई बीजेपी दे 78 मिंबरी विधायक दल दी बैठक सद्दी गई ऐ। मुख्मंत्री दे औह्दे लेई केई नाएं पर गल्लबात होआ करदी ऐ। इंदे च 6 बार दे सांसद ते साबका केन्द्री मंत्री जुएल ओराम, बीजेपी दे वरिष्ठ लीडर ते सांसद धमेन्द्र प्रधान, नमें चुनोए दे विधायक सुरेश पुजारी, मोहन चरण मांझी ते जम्मू कश्मीर दे साबका उपराज्यपाल गिरिश चन्द्र मुर्मू मुख् न। बीजेपी ते प्रधानमंत्री औह्दे लेई चुने गेदे नरेन्द्र मोदी होरें अपने चुनां प्रचार दरान वादा कीता हा जे नमां मुख्मंत्री धरतीपुत्र होग। ओडिशा विधानसभा चुनाएं च बीजेपी नै 147 सीटें चा 78 सीटां जित्तियै शानदार जित्त हासल कीती। बीजेपी गी 51, 14 कांग्रेस गी ते होर दुएं गी 4 सीटां थ्होइयां।

<><><><><><>

Sonia Gandhi

कांग्रेस दियां वरिष्ठ लीडर सोनिया गांधी होरें गी कांग्रेस पार्लिमानी पार्टी दी अध्यक्ष चुनी लैता गेआ ऐ। कल संजा मीडिया कन्नै गल्ल करदे होई पार्टी दे नेता राजीव शुक्ला होरें दस्सेआ जे उनें इस औह्दे गी स्वीकारने दी गुजारश मन्नी लैती ऐ। एह्दे शा पैहले कांग्रेस

कार्ज समिति नै आम सैहमति कन्नै पास कीता गेदा राहुल गांधी होरें गी लोकसभा च विपक्ष दा नेता बनाए जाने दा प्रस्ताह रखेआ। प्रेस कांफ्रेंस गी संबोधत करदे होई पार्टी दे वरिष्ठ लीडर के.सी.वेणुगोपाल होरें आखेआ जे कांग्रेस दी कार्ज समिति दा मन्नना ऐ ते राहुल गांधी हुंदी अगुवाई विपक्ष गी निग्गर ते सशक्त बनाग।

<><><><><><>

NTA

शिक्षा मंत्रालय नै राश्ट्रीय मैडिकल स्नातक प्रवेश मतेयान नीट दे 15 सौ थमां मते मेदवारें गी ग्रेस मार्क्स दित्ते जाने दी समीक्षा आस्तै इक पैनल कायम कीता ऐ। राश्ट्रीय परीक्षा अर्जेसी एनटीए दे महानिदेशक सुबोध कुमार सिंह होरें दस्सेआ जे पैनल दी अध्यक्षता संघ लोक सेवा आयोग दे साबका अध्यक्ष होर करगंन। एह समिति इक हफते दे अंदर अपनियां सफारशां देश ते मेदवारें दे नतीजे इह समीक्षा बी कीती जाई सकदी ऐ। मैडिकल ते डेंटल प्रवेश परीक्षा दे नतीजे 4 जून गी घोषत कीते गे हे। केई मेदवारें सुआल पुट्टदे होई परतियै मतेयान दी मंग बी कीती। केई मेदवारें अदालत च मामला दर्ज करोआया। नीट आस्तै 24 लख शा मते विद्यार्थिएं पंजीकरण कराया हा ते 97 फीसद मेदवार मतेयान च बैठे हे।

<><><><><><>

Weather

मौसम विभाग नै पूर्वी ते मध्य भारत च अगले चऊं दिनें तगर सख्त गर्मी जारी रौहने दा अंदाजा लाया ऐ। उत्तर प्रदेश, मध्य प्रदेश, झारखंड, बिहार, पच्छम बंगाल, ओडिशा, पंजाब ते हरियाणा दे किश हिस्सें च 12 जून तगर सख्त गर्मी आले हालात बने दे रौहगन। अगले चऊं दिनें दरान पच्छम-उत्तर भारत च तापमान च 3 शा 4 डिग्री तगर बाद्धे दी संभावना ऐ। अगले 5 दिनें दरान उत्तर-पूर्वी भारत, पच्छम बंगाल, बिहार, झारखंड, ओडिशा, मध्यप्रदेश ते छत्तीसगढ च गर्जो-गर्जी कन्नै बरखा बरी सकदी ऐ। इयै नेया मौसम अगले 4 दिनें तोड़ी गोवा, महाराष्ट्र, कर्नाटक, केरल ते लक्षद्वीप च बी बने दा रौहग। अज्ज जम्मू कश्मीर, लद्दाख, हिमाचल प्रदेश ते उत्तराखंड सनें समूलचे उत्तर भारत च इयै लेई गर्मी बने रौहनो दी संभावना ऐ।

<><><><><><>

Ramoji Rao

तेलंगाना सरकार नै मीडिया जगत दी मन्नी परमन्नी हस्ती रामोनी राव होरें गी राजकीय सम्मान कन्नै खीरी विदाई देने दा फैसला कीता ऐ। रामोजी राव हुंदा कल काल होई गेआ हा। उनेंगी अज्ज हैदराबाद स्थित रामोजी फिल्म सिटी च खीरी विदाई दित्ती जाग। रामोजी राव हुंदे सम्मान च आंध्रप्रदेश सरकार नै 9 ते 10 जून आस्तै राजकीय सौग दी घोषणा कीती ऐ। इस दरान राज्य च सारें सरकारी दफतरें च राश्ट्रीय झंडा अददा झूके दा रौहग ते कोई बी अधिकारिक मनोरंजन आले कार्यक्रम नेई होंगन।

<><><><><><>

Fishing

केरल च मशीनी नौका थमां मच्छी फगडने पर अज्ज रातीं थमां 52 दिनें तगर पाबंधी रौहग। एह पाबंधी मच्छी फगडने आली रिवायती नौकाएं पर लागू नेईं होग। पर इस अवधि च बंदरगाहें ते मच्छी लैंडिंग केन्द्रें पर डीजल बंकर बंद रौहग।

<><><><><><>

Survey

घरेलू उपभोग खर्च पर स्टैटिस्टिक्स ते कार्यक्रम अमलावरी मंत्रालय दे सर्वे थमां पता लग्गा ऐ जे ग्रामीण भारत दा औसत म्हीनेवार खर्च अगस्त 2022 थमां जुलाई 2023 दे मकाबले च शैहरी भारत दे मकाबले च 71 प्रतिशद घट्ट ऐ।

<><><><><><>

Cricket

आईसीसी मर्दे दे टी-20 विश्व कप क्रिकेट च वैस्टइंडीज ते युगांडा बश्कार मैच खेड्डेआ। टॉस जित्तियै पैहले बल्लेबाजी करदे होई वैस्टइंडीज दी टीम नै 5 विकटां मोआइयै 173 रंज बनाए। परते च युगांडा दी समूलची टी 12 ओवरें च 39 रंज बनाइयै आउट होई गोई। अज्ज इक होर दुए मैच च न्यूयार्क च भारत दा मकाबला पाकिस्तान कन्नै होग। मैच भारतीय समें मताबक रातीं 8 बजे शुरू होग।

<><><><><><>